

JA MYĪDU'UKPI NØKY MIDI JA PABLO TYANĠGAJX JA TIMOTEO

Ku ja Pablo ojts tnĵjayi ja Timoteo

¹ Øts idø'øñ Pablo'ajtp. Øts ja Jesucristo ngu-danaapy sam øts tø xpikta'aky ja Dios Teety midi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nitso'ok'ajtin xmø'øyindit.

² Mets Timoteo ya'at nøky ndanija'ayip. Mjagya-jpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuukxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Ku yikni'ane'emy jøts kyayikupøkt ja ka'øy'ixpøjkin midi ka' tyiyi yjanchi

³ Tan meets jam Efeso kajpjotp sam tø nda'ane'emy ku øts jam wyinaty nnøjkxwa'añ jam Macedonia. Ana'am ja jaay'idi midi jam winaagindi jøts kidi ja tnanky'ixpikyidi ja winmaa'ñ midi ka' tyiyi yjanchi

⁴ jøts nayide'en kidi nugo tyikmøjtøkidi ja kwenti ja madya'aky midi nisudso'ampy katiidyøjkip. Nugo amyøñ tsaachyøñ tnimadya'aky ja aptøjkti. Nugo adøm njakajpxy'ajtyindi sudso tpaaty, nisudso'ampyts kyatiidyøki. Niwine'en adøm ja xkabudøjka'andi jøts adøm nbaduujnin ja Dios yja'

midi adøm ja tøm xaniþijkyim midi tøm nyikmø'øyindi janchja'wingøjxp.

⁵ Jøts ja'agøjxp ya'at myikta'ane'emy jøts nixem niyam ja tsojkin xjagyaptit midi ja Dios yja'ajip, midi yiktump øy'ajtingøjxp øwyinmaa'ngyøjxp ku ja nadyamiyoxi ñaxy amuum janchja'wingøjxp.

⁶ Tøts yøm winaagin tmajtstutnidi jøts nugo ñanktyuu'tigøyidi ku tpabøkti ja winmaa'ñ midi nisudso katiidyøjkip, nugo nadøki tnikeyjpxy'atti.

⁷ Ja' chojktip jøts kyajpxwejpi'attit sa ja Moisés kyutujk wya'añ, ni tkaja'gyukidits ja wyinmaa'ñ køm sa jaty wya'andi, ni ja y'ixpøjkinbaat tkanijawidi midi nadyijyi ñigajpxtip amimøjnija'wibim tiy janch.

⁸ Nnija'windip adøm jøts ku ja'abi kutujk y'øyi ku jade'en tyunkpaaty sam tøm yiktanibiktaagi.

⁹ Jøts yiknijawit nayide'en jøts ku nima ja kutujk kyayiktanibiktaagi ja øyja'y midi katundigøødyip; pøm ja'axi ja kutujk wya'añ ku ja tøm kyøjy jøts ja tyu'unt ma ja jaa'y pøm tum nay'adsep tja'widip, pøm kamadoodip. Jaa ja tyuñ ma ja ka'øyjaa'dyi, ma ja møjpkøyjaa'dyi; pøm tkawindsø'jkidip ja Dios, pøm tkawindsø'jkidip ja tsinaa'yin; pøm ja yikjaa'y'oo'k tyunk'ajtpy, øy ja tyeety ja tyaak ja tyik'ooktit tyiktigø'ødyit. Jats idø'on ja kutujk tyunkpaaty jøts ja tpayø'øy

¹⁰ pøm namyøøt'ajtidip nugo, yam ja ka'ap y'amajtsk'atti; uk tmøøt'atti myiyaa'dyøjk myidø'øxyøjk; pøm jaa'myaa'tstip, pøm myigu'uk twin'øøndip, pøm ja Dios nugo tniwambajttip jøts ja myigu'uk twin'øøndi. Nayide'ents ja kutujk tpayø'øy pøm ja øy'ixpøjkin tkatsojpk,

11 ja øy'ixpøjkin midi tniǵajpxp ja øgyajpxy ja ømyadya'aky, ja Dios yja' midi yikniʔsokp, midi øts yam tø nyiktanipiky.

Tyamøja'wip ja Pablo ja Dios ku ja pya'ayoyiyi

12 Ndukmoja'wipts ndukunuu'kxyja'wipts øts ja nwindson'ajtim Jesucristo pøn ø tø xyikjotmøktā'aky jøts øts ya'at ndunkjøøjp ndu'unt. Tøxi øts ja x'ixy jøts ku øts ja nmi'øy'aty, xjats øts ja tø xpikta'aky jøts øts ja jade'en nmi'du'unt.

13 Ja' øts idø'øn jade'en kø'øm xump, øy øts idø'øn ja y'ijty nja'axøøkmigajpxy, øy øts idø'øn ja y'ijty njabawidity jøts øts ja nmatswa'añ ngawindiy'ajtingøjxp jøts øts ja y'ijty nyik'amjaty nyiktsaachjaty. Møj ja Dios ku øts ja xpa'ayøøy, ka'ap øts ja wyinajty njanchjawinim, ni nganijawi øts pøni ti øts jade'en ndumpy.

14 Paty øts ja nwindson'ajtim møj ndukmojawwi ku øts ja xukjanchja'wiyi ja yja', jøts jade'en ja nmigu'uk ndsojkindit nminamyajyindit ku møøt n'ejtindit ja Cristo Jesús.

15 Tiy'ajtin yø' jøts niduki'iyi njanchja'wa'ant: ku ja nwindson'ajtim myiñ ya naxwiiñ jøts ja tyiknitso'ok'ajty ja pøjkpitumbi jaa'y. Møj tundigøøbyi øts y'ijty, nika' pøn jade'en.

16 Jade'engøjxp øts ja Dios xpa'ayøøy jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkmimee'kxy. Jade'en ø ndunjøpi sudso yikpaatt ja jujky'ajtin midi xemikøjxp ku ja yikpabiky yikjanchjawi.

17 Paty nayide'en nwindsojka'ant, nmøja'wa'ant n'øyja'wa'ant ja Dios Teety midi

nwindsøn'ajtyindip xemikøjxp, ni kya'øøky ni kyadigøy ja', ka'ap ja yik'ixy. Ja'ayi dø'øn tu'ugyi ejtp, pøn tnija'widyaapy. Jade'en idø'øn ja y'ejxi tyiyi.

¹⁸ Mets u'nk Timoteo, mets ya'at ndanipijkpy jøts yikxon xpadu'undit ja Dios yja' samdam mmimadyajkidi ja Dios kyugajpxtyi. Mjanchjawip ja nwindsøn'ajtim amumjoojt jøts øy ja mwinmaa'ñ xyik'lett.

¹⁹ Jaa winaagin jade'en yjajttøø ku ka' tmøjpiktaktøø sam tjanijawidi, jade'ents ja yjanchja'win tø tyuu'tigøydi

²⁰ sam yjajttøø ja Himeneo jøts ja Alejandro. Tøxi øts ja kutujk nmø'øy ja Satanás jøts o sagasa ja y'ayo'on ja tpaajtidit jøts jade'en tjajgyukidit jøts ku ja Dios kyayikwindsøy.

2

Ku Pablo ttukmadøøy ja Timoteo sudso tkugajpxa'akt o pøngapøn jaa'y

¹ Ixya meets jawyeen ndukmadøy jøts ndanipøkti jøts møk xukunuu'kxyjawidit ja Dios jøts x'amido'odit xpøktso'odit jøts tpudøkit ja naxwii'ñit jaa'y.

² Kuwandaagidi ja windsøndøjk ja kudunktøjk jøts øy tsuj nyiknaxindit agujk jotkujk, jøts ja Dios jade'en ni'amuki xkunuu'kxindit ku amumjoojt nwindsø'jka'ant nwinja'wa'ant.

³ Ku jade'en nbadu'unint jade'ents t'øyjawwi ttsujawi ja Dios midi xyiknitso'ok'ajtimp,

4 Jabi jade'enxi ja ttsøky jøts niduki'iyi nnitso'ok'ajtindit jøts nnija'wa'andit ja tyiiby i ja yjanchpi.

5 Tu'ugyi jaa ja Dios Teety, jøts nayi tu'ugyi ja' midi xyiknitso'ok'ajtim jam Dios wyindum: ja nwindson'ajtim Jesucristo, ja' pøn jaa'y'ajtin nayide'en myøøt'ajtpy.

6 Ojts ja nwindson'ajtim Jesucristo ñagyøyakyi jøts ja ojts xku'oo'ka'am adøm nbøkyøjxp jøts adøm nitso'ok'ajtin jade'en nbaajtyindi, xjats ja jade'en enkyi tø yiknijawinim ku ja xøøw ja jumøjt tø tpaatynim sa ja yjajty kyubejty.

7 Ja'agøjxp øts tø nyikpikta'aky kugajpxy'ajtpi ku'aaw'ajtpi jøts øts ja janchja'win jøts øts ja tiy'ajtin nduk'ixpøktit pøn ka'israelit jaa'dyi. Tiy janch øts idø'øn nwa'añ, ka' nugo ndabyaaty, pø ja Cristoxi øts amuum njanchja'wip.

8 Paty ø nwa'añ, jøts o ma pøn tja'myatstit ja Dios, ka'ap ja tsep, ka'ap ja aka y'øyi. Tu'ugyi amuum nbiktaajkin ja njanchja'win.

9 Jøts ja tø'øxyøjk, tuda'aky'ajtin øyjaay'ajtin yiktundip. Ka'ap ja ja'abi wet tpikta'aktit midi namyikaxi kaxø'kp midi ja myigu'uk nugo tyukta'amutskidip. Kidi namyikajxingøjxp ja wyaay tyik'øyidi tyikpaadidi.

10 Jade'en ne'egi tpudøkidit ja myigu'uktøjk ku ja øy'ajtin tyiktu'undit sam ja'adi pøn ja Dios tø ñadyamiyøxyidi.

11 Ku ja Dios yja' yikajpxwa'kxy, amøñi ja tø'øxyøjk tpatmado'odit, tuki'iyi ja yuyj'ajtin tpikta'aktit.

12 Ka'ap mibaat ja tø'øxyøjk tkajpxwa'kxit ja Dios

yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit.

¹³ Jabi jawyeenxi ja Dios tyikaxi'jky ja Adán jøtsnim ja Eva.

¹⁴ Jøts ja Adán ka'ap ja yikwin'ii'ñ. Ja tø'øxyøjk ja' ne'egi yikwin'øø'n, jøts ku yikwin'ii'ñ jade'ents ja pøky tpaajty.

¹⁵ Jade'en'ampy ja tø'øxyøjk ja nitso'ok'ajtin tpaatti ku ja u'nktaak'ajtin tyik'awa'andi, ku ja janchja'win tpadu'undit, ku tjagyaptit ja tsojkin jøts ja wa'ats'ajtin, jøts møøt ñadyabudøkiyidit ja ja'gyukin.

3

Sa yjaa'y'attit pøn ana'amp tsaptøjkjotp

¹ Janch t'iy'ajtin yø': janch øy yø'øbi tunk pøn tniwindsøn'ajtwamp ja Dios yja'.

² Paty nayide'en øy tsuj yjaa'y'attit jøts ka' nugo o sa yiknøjmidit. Pøni jam ñidø'øxy, tu'ugyi ja tmøøt'att, ka'ap ja kawinaak. Tuda'aky yjaa'y'att, sam ja tyunk tmøøt'aty ja'ats pyadu'ump. Jøts twindsø'øgit twinjawit pøn nimejnip nija'jt'ip jam tyøjkjotp; jøts øy tsuj nayide'en yik'ixpøkt;

³ ka'ap y'øyi jøts y'amu'u'kyjaa'y'att jøts ka'ap tsep t'ixa'at. Ka'ap ja myigu'uk nugo twin'øønt jøts ja meeñ jade'en tpaatt. Ja' tsojkip jøts ja pa'ayo'owin ttu'unt jøts ka'ap ja meeñ nugo pøkpaat tjawit.

⁴ Øy tsuj y'u'nkteety'att sam pyaat'aty jøts tuki'iyi t'ext yjønjojp, jøts ja y'u'nk øy tsuj wyindsø'øgiyit;

⁵ ku jade'en pøn tkatu'unt yjøn jotp tyøjk jotp sam u'nkteety'ajtin, ¿sudsots ja t'ana'amt pøn ja Dios tjanchja'widip?

⁶ Ka' pyaāt'atyī ana'ambi tyøkit pøn tjembyabøjkip ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tø tyaja'adyi ja ayo'on.

⁷ Nayide'en chøkyi jøts ttunjøpit ja øy'ajtin ja tuda'aky'ajtin jøts jade'en wyindsø'øgiyit pøn ja Dios yja' tkabaduujnīpnīm, jøts ka'ap ja jade'en pøky tyaja'adiyit jøts nayide'en ka'ap ja miku' nugo wyin'øøniyit.

Sa yjaa'y'attit ja møjaa'dyøjk pøn tundip tsaptøjk jotp pøn tpudøjkip ja ayoobi jaa'y

⁸ Nayide'en ja møjaa'dyøjk pøn tkumaadyip ja ayoobi jaa'y jøts tyuda'aky'att y'øyjaa'y'att jøts kø'øm ñawyindsø'øgiyit. Ka' ti ttu'undit, ka' ti tkajpxtit. Ka' myuktigø'ødyit jawyeen ja'adi, jøts ka'ap ja meeñ nugo pøkpaat tjawidit.

⁹ Øy tsøky wa'ats tnijawidit sa ja Dios yikjanchjawi midi y'ijty kayiknija'wip, jøts ja wyinmaa'ñ øy tsuj wa'ats tmøøt'attit.

¹⁰ Ja' tsojkip jøts yik'ext yiknijawit pøni ka' ti tundigø'øyin tmøøt'atti, møjaa'y'attipts ja' jøts tkuma'adyit ja ayoobitøjk.

¹¹ Nayide'en ja ñidø'øxy tyuda'aky'ajtmidit y'øyjaa'y'ajtmidit. Ka' nugo yjemgajpxtit pyagajpxtit. Ja' tyu'undip midi tiy'ajtin.

¹² Ja møjaa'dyøjk tu'ugyi ja ñidø'øxy ja tmøøt'att, jøts øy t'ext ja y'u'nk y'una'jk jam yjøn jotp tyøjk jotp.

¹³ Ja møjaa'dyøjk pøn øy tsuj tundip sa ja tø yiktanipøkti, jinaxy ja myøjtøkidi jinaxy

ja yikwindsø'ogidi jøts ja nayide'en ka' tsep t'ukja'wiñidi tñigajpxtit sudso yikjanchjawí ja nwindson'ajtim Jesucristo.

Sa Dios ja wyinmaa'ñ tnanky'ijxyiyi midí y'ijty kayiknija'wipnim

¹⁴ Tsojk ø nnøjkxt jøts me n'ats'ext; ixyamts mets ya'at nøky ndanijayi.

¹⁵ Ku øts jotmøñ nda'anigyojt, jøts xnijawit sa njaa'y'ajtindit møøt ja nmigu'uk pøn tø tjanchja'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn tñigubojktip ja tyiibyí ja yjanchpi.

¹⁶ Janch tiy'ajtin yø', ku janch møj ja Dios wyinmaa'ñ midí y'ijty kayiknija'wip. Ixyamts yik'ixy yiknija'wí jabi jade'enxi jap jaabyety y'ity ku:

Jaa'yin ja nwindson'ajtim Jesús ñanky'ejxyiyi ya naxwiiñ;

jøts ja Espíritu Santo tñigajpxy ku ja' tiy'ajtin tmøøt'aty

jøts nayide'en ja ankilistøjk y'ejxøø ñija'wiyøø.

Tø yikajpxwa'kxy ja Jesús y'ixpøjkin o magajp,

jøts jade'en tpadundi ja naxwii'ñit jaa'y

jøts ja chajpajtnaa ma ja Dios Teety jap.

Jade'en ja nøky wya'añ.

4

Sa winaagin tmajtstu'uttit ja Dios'ajot'ajtk

¹ Tiy'ajtin ja Espíritu Santo wya'añ ku winaagin tmajtstu'uttit ja Dios'ajot'ajtk ku wyinaty wyingøñ jøts kyøxt ja naxwii'ñit. Jøts ja tpadu'undit ja

ixpøjkin midi ka' tyiyi yjanchi, midi ja miku' yja'ajtpy.

² Ja'abi jaa'y ja tmodo'odip pøn taay'ajttip pøn ja pyøky tkaja'widip øy ja tjanijawidi ku møj tø tyundigøydi.

³ Jade'en wya'andit jøts ku ka' n'amajtska'ant jøts ka'ap o ti njøø'kxint øy ja Dios ja kø'øm tø tjabikta'aky; pø tøxi ja Dios ja ttanibiktaagi jøts ja nyiktunkpaajtindit tuki'iyi ja pikta'aky, pøn jaty ja Dios tjanchja'widip pøn jaty tnija'widip ja tyiiby i yjançpi yjøø'kxtipts ja', wan Dios ja ttamøjawidi ttagunuu'kxyjawidi.

⁴ Midi ja Dios tø tyik'øyi, tum øy ja', ka'ap adøm ja ngagupøjkint. Ndamøja'wimp ja Dios ja' ku nyiktunkpaajtint,

⁵ ku ja jade'en ndu'unint kunuu'kxyts ja wyimbejtni ja pikta'aky sam ja kyajpxy wya'añ.

Sa ja Jesucristo øy tsuj yikmiduñ

⁶ Ku ya'at øy xuk'ixpøkt ja migu'uktøjk, øy idø'on ja Jesucristo wyinaty xmiduñ, jøts m'ajot'atp ja', myiktunkpaatp ja' ja ixpøjkin sudso n'ajot'ajtim ja Dios midi ixyambaat mgamajstutpy.

⁷ Ka' xmøjpikta'akt ja kajpxy ja ayuujk midi ka' tyuñ. Amumjoojt ja Dios yja' xpaduujnit;

⁸ øy nugo njanay'ejx'ejtint jøts møk møjaaw nyiknajxint, ja Dios yja' ne'egi møj ku nbaduujna'ant. Ja'ats xpudøjka'amp jøts øy tsuj ndsinaa'yint jøts nayide'en ja øy'ajtin xukpaajtint xemikøjxp.

⁹ Janch yø' tiy yø', paat'ajtip jøts yø niduki'iyi nbadu'unint.

10 Ja'agøjxp møk ndu'unint øy njagu'ayo'ombaajtindi øy njayikjemdu'uñindi nyiktedu'uñindi. Ka' ti ngumaa'yindit, jabi tøxi ja Dios xmø'øyiindi ja jøp'ejxin jøts niduki'iyi tyiknitso'okt pøn jaty pabøjkiyip.

11 Yø'øbi winmaa'ñ idø'øon mni'ana'amp jøts nayide'en xnanky'ixpøkit.

12 Øy tsuj jawyeen xunjøpit sam pyaat'atyin tpadu'undit pøn ja Dios tjanchja'widip jøts jade'en myikupøkt øy mja'una'jkinim; jøts ja m'ayuujk øy tsuj xyikpidsø'ømt møøt ja m'øyjaa'y'ajtin, møøt ja mba'ayo'owin, møøt ja mjanchja'win.

13 Ku øts jam udyaa'gyi nja'att, kajpx ja nøky jam mā mnamyukyidi sa ja Dios kyajpxy wya'añ. Yikxon xukwinjawit ja migu'uktøjk jøts ja yjotmøktā'aktit, yikxon waani xyik'ixpøkt.

14 Yiktuñ ja møk'ajtin ja wijy'ajtin midi ja Dios tø mmø'øyi, Dios waan ku ja møjaa'dyøjk ojts mgønixajyi.

15 Tu'ugyi xu'unt yø'øbi winmaa'ñ jøts jade'en t'ejxtit tnijawidit sa tø xyikmiweni xyikaja'aji ja mja'gyukin jøts ja mjanchja'win.

16 Øyim mnay'ejx'ettit kø'øm midi mwinnmaa'ñ'ajtpy, midi mduk'ixpijkpy, midi mduknija'wip ja migu'uktøjk, tu'ugyi xyik'ett midi mdumpy. Ku jade'en xu'unt mbaatpts ja øy'ajtin jade'en, nayide'en ja'adi pøn tmadoodip ja ixpøjkin.

5

Sa ja Timoteo møøt y'ett pøn ja Dios tjanchja'widip

1 Ka' xwindso'ot, ka'ap o sa xnøjmit ja møjaa'dyøjk; ne'egi tuda'aky xkajpxwejt sam ja mdeedyin; nayide'en ja una'jktøjk øy tsuj xjawit sam ja mgø'ømigugin.

2 Nayide'en ja møjaa'dyø'øxy xwinjawit xwindsø'øgit sam ja mdaagin, jøts nayide'en ja kiixyuna'jkti sam ja mgø'øm'uchin, jade'en ja mduda'aky'ajtin xyiktu'unt.

3 Pudøki ja ku'øktyø'øxy pøn ti kadyimy'ejtxip.

4 Pøni jamts ja ku'øktyø'øxy møøt y'u'nk y'una'jk møøt y'ap y'ok, jade'en ja una'jk pyaat'atyidi jøts ja tpudøkidit ja tyeety tyaak jøts ja tyikwimbejtniyidit ku ja tø y'ijxyidi, yø' Dios y'øyja'wip, jade'en Dios ttsøky.

5 Ja ku'øktyø'øxy pøn nadyu'uk tø tyañ, pøn nipøn ka'ejt p, ejtpts ja Dios ja t'ajot'aty jøts ja pyudøkiyit, ka'ap ja Dios ja tja'dyigøy jøpy ux.

6 Jamts nayide'en ja ku'øktyø'øxy pøn ja Dios tka'ajot'ajtp. Tyumpy ja' pøni ti ja tyunwampy, øøky ja ñabyiktaajkniyi.

7 Tukmadow yikxon, wan tnijawi jøts ka' pøn øy sa ñøø'mxiyit.

8 Jamts winaagin tkajotmay'aty ja myigu'uktøjk, abiky tpikta'aky ja yjøøn ja tyøjk jøts ja t'ixmajtsni ja Dios'ajot'ajtk. Tyimwyenkts ja ne'egi pyidsimy, ka'ap jade'en pøn ja janchja'win tkajagyajptinim.

9 Yø ku'øktyø'øxy yiklisti'atp midi tugi'pxy jumøjt pøni tøts ja tu'ugyi ñiyaa'y tø t'atsmøøt'aty, paat'ajtiyip ja mibaat yikpudøkit.

10 Mibaat ja yikpudøkit ja'agøjxp ku tø y'øyjaa'y'aty, pøni tø y'u'nk y'una'jk yikxon tyikyeekey tyiktsø'øky, pøni tø øy tsuj t'adsøy ja

jaa'y pøn tøj'ayø'odyip, pøni tø yikxon twinjawi twindsø'øgi ja myigu'uk pøn tø tkupøjknidi ja Dios, pøni tø tpudøki pøn amajajtíp tsaachjajtíp, uk pøni tø ttuñ jadu'uk øy ti may'ajt øy ti pudøjkin.

11 Ka' mibaat yikjaabyatt ja ku'øktyø'øxy pøn unaj'knim; ja'agøjxp ku jotmøn y'amajtskit, jade'en'ampyts ja Cristo yja' ka'pxy tka'ukpadu'uniiyt,

12 jøts yikpøky'ixy ku tø tmajtstutni ja' midi tø t'ukpadøki.

13 Jats ja' pøn nugo ttunk'ajtp ja tøk'ayø'øky, ja nuux'ajtin ja pagajpxk nugo jade'en myiwidijtpy, jøts nugo ttatøki midi jagapaat'ajtiyip.

14 Paty y'øyi jøts y'amajtskit pøn ku'øktyø'øxy unaj'knim, jøts ja y'u'nk t'ext tjagyapt sam pyaat'atyi jønjøtpy tøj'jøtpy n'ejxint njagyajpint, jøts ka' nugo ja jaa'y pyagajpxiyit.

15 Jamts winaagin pøn ja Dios yja' tø tmajtstuuji, ja miku' yja' tø tpanøjkxiyi.

16 Pøni pøn ja Dios yja' tø tkupøjkidi jøts pøni jam ja myigu'uk ku'øktyø'øxy, mibaat ja kø'øm tpudøkidit pøni ti ja ka'ejtixip, jøts ja ka' pyudøkiyidit ja møjaa'dyøjk midi tundip jap tsaptøj'jøtpy. Jade'en'ampyts nayide'en yikpudøkit ja ku'øktyø'øxy pøn ja myigu'uktøjk kadyimy'ejtíp.

17 Ja møjaa'dyøjk midi tnigutujk'ajttíp ja janchja'wibidi jøts nwindso'jka'ant nwinja'wa'ant. Jamts ja' midi xuk'ejximp xuk'ixpøjkimp ja Dios kyajpxy, ne'egits ja møj nwindso'jka'ant jøts ja nbudøjka'ant.

18 Jabi jade'enxi jap jaabyety y'ity: “Kidi ja

mdsakaā ajeñ xyik'okti ku ja xyiktunwa'andit.” Jøts nayide'en: “Ku jaa'y nyiktu'unint kuwani myijuu'ñ ja ttsøky.” Jade'en ja nøky wya'añ midi ıxa tø xnijawidi.

¹⁹ Ka' xmøjpikta'akt ku yikni'øønit ja møjaa'dyøjk pøni ka'ap ja a'ejxnaxpi te majtskin uk tigøøgin.

²⁰ Pøni tundigøy'adøtstip ja møjaa'dyøjk, mibaats ja jam yiktamigajpxt ma ñamyukyidi ja janchja'wibidi jøts jade'en tjøptsø'øgidit tjøpjawidit ku tyundigøydi.

²¹ Ku ya'at jade'en ndanipiky wa'ats Dios Teety tmadøy, wa'ats ja nwindson'ajtim Jesucristo tmadøy møøt ja ankilistøjkti, jøts øy yikxon idøøn xpadu'unt yø ana'amin, ka' pøn nugo xukta'oo'kpatt. Pøni pøn tundigøødyip tuknax ja xpayø'øty.

²² Ka' nugo ajawi xpikta'aktit ja møjaa'dyøjk midit nigutujk'atp ja janchja'wibidi, jawyeen yik'ext yiknijawit pøni sa yjaa'y'aty, kuts kya'øyjaa'y'aty jøts ja pyøky ttapaatt ja janchja'wibidi, øyim mnay'ejx'etit jøts ja pøky mgapaadit.

²³ Kidi nugo tsuxknøø xumi'uuky, pø pøjk'ejtpxi xijy mjoojt, vino m'uukp waani.

²⁴ Pøn tundigøødyip midit yiknijawip wa'ats, ja'ats yikpayø'øpy, miditits kayiknijawip jaanims ja yiknijawit ku ja payø'øyin xøøw y'ett.

²⁵ Nayide'en ku ja øybi ndu'unint; øy ja jatyı yja-gayiknijawi, kuwani yiknijawi udyaa'agyi. Ka'ap ja jadi'iñi tyañ.

6

¹ Yø tumbitøjk øy tuda'aky yjaa'y'attit jøts twindsø'øgidit yikxon ja wyindsøndi, jøts ka'

nugo ja Dios yikpagajpxt, jøts nayide'en ka' nugo nyiktabagajpxint ja n'ixpøjkin.

² Nayide'ents ja tumbitøjk pøni jam ja wyindsøn midi nayide'en tpadump ja Dios yja', ne'egi møjts ja twindsø'øgidit, pø pyadumpxi nayide'en. Jade'ents ja ne'egi tpudøkidit sam ja tsojkin tjagyapti. Me Timoteo, tukmadow kajpxwa'kx yø'øbi ana'amín midi nnigajpxpy.

Sa ja Dios yja' nbaduujna'ant jøts agujk jotkujk n'ejtint

³ Pøni jam pøn tkajpxwa'kxy ja wenk ixpøjkin midi ka' tminabyaadyi ja nwindsonsø'ajtín Jesu-cristo yja', midi tkawindsø'jkíp ja Dios,

⁴ nugo ja ñamyikexyi, ka'ap ja tñijawi pøni ti kyajpxpy. Nugo tyikjø'øpy ja winmaa'ñ ja ixpøjkin; jøts jade'en nugo ja tsep tyiknaxkida'aky ku nixem niyam ja ñanky'amutskiwyā'añidi.

⁵ Nugo ja y'awa'an'ajtk tyiktunidi ku tka'uknija'wiñidi ja tyiiby. Nugo win'øø'ningøjxp nadyijyi ja Dios yja' ttuujnidi. Jade'en ja wyinmaydi jøts jade'en tijy ja kumeeñ'ajtin yikpaatt. Mets Timoteo, majtstu'ut yø' pøni pøn jade'en jaa'y'ajttip, kidi xminamyayi.

⁶ Jade'en'ampy adøm ja jotkujk'ajtin nmøøt'ajtyim ku ja Dios yja' nbaduujña'am øy meeñ o ti gamøøt'ajtyim.

⁷ Ka' ti pøn tmimiñ ku ngaxi'jkyimp ya naxwiiñ, nayide'ents ku nwindigøø'ña'ant, ka'ats ti n'uk'ejna'ant;

⁸ pøni nbaajtyimp ja ngaajyk ja n'uujkik jøts ja nwet ja nnaamy, ndajotkujk'ajtimpts idø'on ja'.

⁹ Jamts pøn ja kumeeñ'ajtın ttsojqp. Tyumpy, o ti ttu'unt, jøts ja jade'en o sa nugo tpaatt ja meeñ, kø'ømts ja jade'en ñanktyuu'tigøyiđi, ka' tja'gyukidi pøni ti tyundip. Kø'øm ayo'on ja jade'en ñanktyukpaadyıđi, jade'ents ja nugo ñankwyındigøyiđi.

¹⁰ Ne'egi nugo xyiktundigøø'yint xyikajpxigøø'yint ku ja kumeeñ'ajtın ndsojkint; jamts pøn winaagin nugo tsojk'anaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadyıt.

Sa ja Timoteo yikxon tñigubajk'att ja janchja'win

¹¹ Mets Timoteo, kidi me nayide'en m'adøtsmi, pø Diosxi mets ja yja' mbaduujnıp. Yikyø'øy mets ja mdsinaa'yın øy tsuj, ja m'ajot'ajtın jøts ja mjanchja'win. Jøts xminamyayıt øy pøn ja mmıgu'uktøjk, jøts ja tuda'aky'ajtın yujy'ajtın xyıktu'unt.

¹² Nıtani møk yø janchja'win; kidi xmajtstu'uty midi ja Dios tø mdamıdsøkyıyi midi xemikøjxp ejtp, jabi øy tsujxi tø xukmadøy ja mayjaa'y sa ja janchja'win xjagyepy.

¹³ Ja Dios Teety midi xyikjujky'ajtındıp, ñija'wıpts ja', sam ıxyam n'ane'emy, nayide'ents ja nwindson'ajtım Jesucristo ttukmadøøy ja تی'ajtım ja Poncio Pilato.

¹⁴ Paty yikxon xpadu'unt jade'en, midi tø myik-tanıpiky, ka' xyiktıgatst, jøts ka' pøn mbøky'ejxiyıt. Jade'en xu'unt kunım ja nwindson'ajtım Jesucristo mye'ent.

¹⁵ Ku tpaatt ja xøøw ja jumøjt, jøts ja Dios Teety ja tkaxt ja nwindson'ajtīm ya naxwiiñ. Tu'ugyi Dios Teety myøji midi ja øy'ajtin ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en.

¹⁶ Yø' tu'uk møj, ka' y'øøky, xemikøjxp ja y'ity. Jaj agujkpy chøøni mā ka' pøn mibaat pyaadyi y'ijxyi. jYikwindsøjkip yikwinja'wip ku ja myøk'ajtin tmøøt'aty xemikøjxp! Jade'en idø'øn ja y'ejxi.

¹⁷ Ana'am pøn kumeeñ'ajtp ya naxwiiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'attit amunjoojt, pø ja'axi ejtp xemikøjxp jøts tuki'iyi xmø'øyim ja øy'ajtin ja jotkujk'ajtin.

¹⁸ Nøjmi ja kumeeñ jaa'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip.

¹⁹ Ku jade'en tpadu'undit jøts ja øy'ajtin jade'en tpaattit, jøts tmøøt'ettit ja Dios xemikøjxp.

Midi ja Timoteo jaakyiktanipøjkp

²⁰ Mets Timoteo, møjpihta'ak midi tø myiktanipiky. Kidi xmøjpihta'aky ja ka'øy ayuujk midi ja Dios yja' tkaminabyaajtip, midi ñadyijyi yiktejp ku ja tyiy'ajtin.

²¹ Tø winaagin tyuu'tigøydi pøn yø jade'embī winmaa'ñ tpadump. Jade'en ja yjanchja'win tka'ukpadunidi.

Dios mgunuu'kxip, mets Timoteo. Jatp idø'øn jade'en.

**Ja ɔgyajpxy ja ɔmyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

422dcf73-46a5-5403-b423-8406ed76ac1d